


Jekabaara



Cikela ceman n'a musoman kunnafoniseben

a be bo kalo o kalo

Jamana baarada la BP: 2043 Bamako (Mali)

SANNIFEEREYE CIKELAKABAARA NAFA SORO DON YE, A DUN WAATI SERA DE

DAKUN W

№ 2: Wuli-tuma-don ka fisa ni
nsenkadi ye

№ 3-7: Sannifeere kecogo


№ 7: U ko...
Jamana arajow

№ 8: Balikukalan sanyelema
nenaje kunnafoniw

№ 9: Politikiton ye mun ye?
- Maakoroba kuma

№ 11: Kunnawolojala do
yangara Mali kunna
- Musow ka ntolatankola halaya

kòori lajèli



① i bë kòori bolonyé
wòoro walima segin
ta kòori ton na a fan bëe fè.
i bë bolo don fò kònona la.

- i bë bolonyé wòoro walima
segin in bòn kòori siri bòrè
dò kan i b'a nyagami kosèbè

② i bë sorò k'o kòort
dò ta ni ka sègèsègè
ni kòori sègèsègè
manaböréninw ta ye

Kalataw waatiw sera. An ka politikitonw dun be cogo di

KALO LADILIKAN

Kooribow ko ye sanni-feere ye. Sanni feere baaraw be geluya n'a
baarakebagaw ma kalan kojuman peselikelan labaara ko juman ni
Jago kesébenw miné ko juman na. nagamin o nagamin mana ye
sanni feere baaraw kecogo la, o be ke fojogonko sababu ye jekulu
mögow ni njogon ce. Baara nedonko juman ni jelenya ye sanni-feere
sabatilen njebila wale ye

Dawuda N Dayo - CMDT kalanko ni feeréko bolofara nemaa.

Wuli-tuma-don ka fisa ni nsenkadi ye

Anw bë san damado bë, bëleko sekiteri koori juguman ko kuma ka ca. O la ne bë hakilijigin ke anw ka mara cikelawla nin koori jugumanko kan. Koori juguman ye suguya fila ye.

1°) koori jeman ni nagasa nagaminen

2°) koori jeman ni nagasa, ni bilemanw, ni koori tumudamanw nagaminen.

Koori numanyemunye?

O ye koori jelen pewupewu dama de ye

koorinaman bë soro cogodi ?

1°) i k'i ka kooriforo damakene n'i ka dumogó ye. Maa bë se ka kooriforo do sene k'a ñe, nka i te se k'o koori bë k'a ñe.

2nan) koorika furakeliko numan soro, ani k'a furakeli dafa, (koori ni furakeli min ka kan)

3 nan) kooribô waati ka kooriforo saniyalen soro (bin ka na k'a la)


Kooribô

kooribô waati

- i kana koori bongomi la, i kana koori bë sanji jukoro, walima a jima

- i kana koori bë min koorikuru ma dayele ka dafa.


- i bë kooribô bôre ke fila ye juguman bila bôre ani numan bila bôre fo ka kooribô ban. O la i bë koorinuman ni koorijuguman filanan de soro n'a bë fo o ma ko 3 shoi.



Ni cikela ye a ka kooriforo baara a baaracogo latika la, a b'a yere nafa, k'a ka sigida nafa

Janto nyerela

- i ka kôlosilikelaw bila kooribôlaw la koori bôko numan kama.
- i k'i janto i ka dumogow sigi senkan ni ladiyali ye.



Sannifeere don ye selidonba ye dabakala taabaga janaw bolo

kooribô cogo la.

koori marayoro

kana koori bôlen mara jirikorôlaw la, walasa jiribulu kana bôn a la. N'i bë koori ton so kono, i ka d'a la ko sumaya fosi te koori in na, koso kônona fana sumalen te. O tuma i bë cencen ton so kono fôlo, walima belemisen, ka soro ka koori ton o kan.

Ton nemaaw ka niyoro koorijugumanko la

Ni jekulu, walima kafoyiriwatô b'a yere ka koori sah, o koro ye k'o ton kelen de bë mögôw suganti koorifile kama. O la, o koorifile law ka kan ka ke mögô centigiw ye, walasa baara numankelaw kana nimisa ukabaara numanke la. Beleko mara cikeda nemaaw n'a ton nemaaw ye cesiriba ke kooribô ko numa kama salon, n'o ye ka jekulu suganti ka taa fo jebuluku, konobugu mara la, kooribôko numan fileli kama, ani ka jekuluw sigi Beleko sekiteri la minnu bë koorifile ke dugu ni dugu. O wale in ye yelemba don Beleko senekelaw ka kooribô cogo la, n'o ye nafaba ni taanu lase anw ma.

Neb'a nini Beleko sekiteri senekelaw fe, an k'an jija ka baara numan ke jinan ka girinya salon ma, walasa antogoduman ka to a nôna.

Nji Fonba Beleko kafoyirriwatô nemaaw

Sannifeere kecogo

San o san, k'a ta nowanburukalo la, k'a t'a bila marisikalola, senekelaw be u ka seneferenw feere koorisene baarada ma. O waati de be wele ko "sannifeere waati".

Ni koorisene baarada be u ka seneferenw san, a b'o baara ke jamana ka yamaruya de kono.

O sannifeere be kecogo di dugu kono?

Dugu minnu te ton dugu ye, olu senekelaw yerew de b'u ka seneferenw feere koori sene baarada ma. O la, feerelikela bee be jate senekela ye.

Nka, yelema be don a la ni dugu y'a yere ta ka ke tondugu ye. O waati, sanni senekela bee k'a ka feereli ke koorisene baarada ma, duguton yere de b'a ka feereli ke koorisene baarada ma dugu togo la:


Ton duguwla, ton yere de b'a ka senekelaw ka kooriw san, k'u kafo nogen kan.

Ni koori be taa izini na, a be taa ton de togo la, ton de b'a feere koorisene baarada ma, o k'o, a be senekela bee ka wari di i ma, k'a kene ni u bee ka hake feerelen ye a ma (dugu ka peseliw y'a jira cogo min).

Nafa be soro cogo di sannifeere la?

Nafa kota fanfe, n'ikoan ka ton dugu ka nafa soro sannifeere kono, a ka kan ka minnu ke, u file:

- ka koori caman feere



- koori feereta ka ke koori numan ye, o min wari ka ca.

- ka koori feere joona, o min fana be ke sababu ye ka do fara soro kan.

- ton ka kan k'a hakili to a ka tondenwna, k'u deme, ka do fara u ka soro kan, nka, o yoro tona kofo nin seben in kono.

- n'i ko i ka koori ka ke koori numan ye, ton ka kan k'a ka tondenw bee dege koori wolomacogo numan na.


- ni ton b'a fe k'a ka koori feere joona, k'a ka tondenw sara joona, a ka kan ka

sannifeere bee laben yanni a waati ce.

2. Koori numan soro cogo

Koori suguya ye saba ye:

- Koori numan, n'u b'a fo "folo", o ye koori jeman pasipasi de ye, min bora kooriden numan kogolen na, naganaga t'a la, i n'a fo furabulu jalan, koorkalaw, koorfara yere, walima bin. Ntumu dato t'a la, belekise t'a la. O koori ka kan ka lamara yoro numanna yanni a feeredon ce.



- Koori juguman ye koori ye, min te jate numan fe, ale nogolen don, ntumu da tow ni koori kogobaliw b'a la. Ale be soro koori wolomatuma foro kono.

- koori wolomabali, n'u b'a fo 'filanan'. O ye koori ye, i n'a fo a yere togo b'a fo cogo min, o ma woloma kabini foro kono. O ye koori numan ni koori juguman bee nagaminen ye nogen na.

Afokunteko koori numan de be wari soro ka teme tow kan. Ola, a ka fisatonduguwma, uka koori numancaman feere.

Koori numan be soro cogo di?

A folo: ka i ka foro furake, ka kene ni cogoya folen bee ye, ani k'a ke a waati la.

A filanan: ka koori bo joona, ka kene ni koori lakoliden ka folen bee ye, ani k'o lamara yoro numan na.

Koori bocogo ka nogen kosebe: kooribola be minen fila ta, ka koori wolomali damine foro kono: minen kelen ye koori numan minen ye, minen filanan ye koori juguman minen ye. A be a baara ke ten, fo ka kooribon.

I n'a fo senekela caman b'a miiri ko koori ne be bo a dan tuma la, olu te nogen na: "n ye n ka koori dan joona", o te koori ke folo ye n'i ma a bo cogo ninnu matarafa.

Fen daw be koori ne tine an bolo

An ka duguw kono, fen dōw bē ke sababu ye ka an ka kooriw nē tijé an bolo:

- ka dolo to ke koori bo la. An bēe b'a dōn ko doloto ka kow bēe sēgesegelen te.

- koori dōgōdōgonin bōbaliya: an caman b'an jo, fo foro bēe ka je ka ban, ka soro k'an laben a boli kama. Ni san nana ka koori fura jalan gosi wajibi don, o ji ka an ka koori nē tijé. O dun bē ke sababu ye ka do bo an ka koori dawula la.

- an hakili tobaliya denmisénw ni musow la koori bōtuma la.

- koori ladoncogo a bolen ko: an bē koori mara yoro dow la, minnu ma ni: an bē koori da dugukolo jalan na, fijé te don o yoro la, a yorow niginnen don. Halin'ika koori bōcogo bēe nena, ni a marako ma nē wajibi don, a nē be tijé.


- koori bolen marali foro kono jiriw koro ka waati jan ke, i n'a fo nēresunw, wali yoro saniyabaliw, o koori bēe bē fa jiri furaw ni bin naganaga la. hali ni a koori bōcogo nena, a te se ka san "fōlō" la.

Min ka kan ka ke

Duguton nēmōgōw ka kan ka sēnekēlaw lasōminin kow kan, minnu bē ke sababu ye ka u ka koori nē tijé, ka dōbo u ka soro la, ka ton yere ka nafa dōgoya.

- aw minnu ye ton nēmōgōw ye, aw de b'a jira dugumōgō bēe la ko dōlo bē min ci bannen ko, k'a nē fo u ye fo u k'a faamu ani ka je n'a ye.

- aw bē koori bōcogo numan jira sēnekēlaw bēe la, ka taa a ke u nē nā foro do



kono. K'aw to o la, aw bē kunnafoni di ubēe ma ninnu kan:

- koori bolen maracogo numan so kono, wali foro la,
- koori dōgōdōgoninbo, n'a daminena ka je.
- hakili toli musow ni denmisénw na koori bōtuma na.
- k'a jira ko : koori sugu don, mogo nē file t'a la.

Aw ka da a la ko ni koori bēe kera numan ye, ka je kosebē, o bē ke sababu ye ka nōgoya ke Mali jamana ye a feereli la.

Anb'a dōn kofitiinidōrōn de bē taa an ka fini dilan iziniw la, a to bēe bē feere jamana wērew la. Ni an ka koori nē ma nē, koori sanna si tēna an ka koori san, ka d'a kan koorisēnē jamana ka ca dīnē kono.

3. Sannifeere laben cogo

Sanni sannifeere don ka se, tōnjēmōgōw bē fen damadōw sigi sen kan:

- ka basikili bila ka taa sēgesegē, n'a ka ni, koori sēnē baarada la.
- ka koori ta mobili siraw laben, ani ka koori feere yoro siyen

- ka bēe ladonniya koori sandon na.

- sannifeere te taa fen o fen ko, ka o bēe sigi sen kan.

Basikili sēgesegēli

San o san, yanni k'a daminē, a wajibiyalen don basikili bēe ka sēgesegē, k'a jira k'u bēe labennen don sannifeere kama a donbaga jōnjōnw fē. Ni koorisēnē lakoliden ye waati min fo ani ka yoro min jira, bēe ka kan k'o labato.

Sannifeere man kan ka ke ni basikili sēgesegēbali ye. Yamaruya te mogo si bolo ka basikili yoro dōfalen i yere ma, wali k'a fo numuw ka nēge dōdilan k'a don a la.

Siraw dilanni

Fen min bē ke sababu ye ka koori tali nōgoya mobilitigw bolo, o ye siraw labenni de ye samiye bannen ko.

Ola, fo an ka siraw siyen, ka gungurun bēe bō, ka dingew geren ni belekise ni bōgōmugu ye. Siraw san fē jiribolow bē tige, minnu bē se ka mobili basi fara ka koori bōn dugu ma. Pōnw fana bē dilan.

Ni sira kura ka kan ka bō,

an k'an hakili to a la k'a ke sira tilennen ye, min ka surun.

Nisira dilan baara ka bon dugu ma, a ka fisā k'a fo joona koori sēnē lakolien ye, o ka dabali tige a kama.

Koori dōgo labenni

Koridōgo bē laben, i n'a fo nēgen b'a jira cogo min.

Koori so (silo)

Koori sannen bilayōro (silo) bē ke kare ye, k'a kere ben metere 20 ma. A donda ye metere 6 ye, k'a kogo kundama ke metere kelen ni tila ye. A kono ka kan ka furan ka je

A ni dugu kōnōna ce man kan ka dōgoya ni metere 200 hake ye; silo ko ka kan ka siyen ka naganaga bēe furan fo metere 10 nōgōn. O bēe kun ye ka koori tanga kasaara bēe ma, i n'a fo tasuma n'a nōgōn wērew. bari koorisannen bilalen silo kono, a bē dugu taya la hali bi.

A lasōrōli ka kan ka nōgoya, a bē ke koori ta mobilisira da la.

Sanni ke ga

Sannikēlaw ka ga ka kan ka bili ka nē. A jojan ye metere 6 ye, k'a josurun ke metere 3 ye, k'a kundama ke metere 2 ye.

A bē jo ka sin kēnya ma, walasa tile kana don a kono. A bē jo ka banamini silo ma.

Koori ta mobili lafa yoro

Oye banbaliye, minjojan ye metere 6 ye, k'a josurun ke metere kelen ni tila ye, k'a kundama ke santimētēre 80 ye. O ka kan ka laben ka nē.

Sanni kene

Senekelaw b'u ka koori ton sanniké ga kofe. Taama siraninw b'e kooritonyorow ni nogon ce, walasa wotorow ka munumunuyoró soro ani ka koori sirili nogoya.

Na manama ni binw b'e se ka bo sannikené kan.

Koori siri man kan ka den koori marayoro kogow la, walasa koori kana nagami.

Labenni werew

Yanni sanni don ka se, ton nemogow ka kan ka feere siri, min b'a to u ka sanni jekulu mogow b'e se ka kalan ke, k'u laben sanni ne.

Sanni minen misen ka kan ka san, i n'a fo sebenw ni bikiw. I komi, an b'a don ko koordogo gongon ka ca. O la, a ka fisa biki santa ka caya: hali ni biki do kera tinefen ye, baara te jo.

Ni jateminemasin te yen, o fana ka kan ka san.

4. Sannifeere jekulu

Sannikelaw hake yemogó 5 wali mogó 6 ye:

- peselikela nikankorosigi,
- wariseben dilanna (wecelikela),
- sebennikela mogó fila,
- koorifilela n'a ka mogow.

Uka baara fana yekoorisugu labenni ye, k'a baara b'e nogoya.

Ni o mogó b'e ma se ka soro dugu kono, ka d'a kan mogó kalannen caman te yen folo, sannifeere te se ka ne mogó minnu ko, olu ye mogó saba ye:

- peselikela,
- wariseben dilanna,
- koorifilela.

Sannikelaw ka baaraw file nin ye:

Peselikela n'a korosigi**Yanni sanni ka damine**

N'u kalanna u san folo la ka ban, san o san seginkanni be ke o kalan kelen kan yanni sannifeere ka dammine, ni liburu b'u bolo, min togo ye ko "basikilibaara", a be se k'o liburu kalan: peseli kecogo sebennen be o liburu kono, k'a pereperelatige.

Yanni sanni ka damine, peselikela be basikili sigiyoró laben, ka basikili sigi, k'a laben, k'a korobon'a nena ni kilo 2 puwa ye, ani kilo 5 puwa, walima kilo 10 puwa.

Peseli tuma mana se

Peselikela be peseli ke, ka bo kooriton do la ka taa do

la, ka bo a da fe fo a ka ban: koori siri bore kelen kelen walima fila fila be sigi basikili la.

Peselikela be koori peselen kilo hake jenjén fo bamanankanna, k'a faransi konuman. Min be fo, o ye koori kilo hake ye, koori siri borew kilo hake bolen ko a la, ben be ke dugu kono koori siri borew kilo hake tigeta kan sanni sannifeere ka damine.

O ko, peselikela b'a nini mogow fe, u ka koori peselen jigin, ka do were yelen. Ka peselikela to a ka baara la, a korosigi fana b'a janto a la, k'a nomine fili ko ta fan fe.

Koorifilela**Yanni sanni ka damine**

Ni a ka san folo kalan temena, san o san seginkanni be ke a ye, ka ke hakilijigin ye a fe

A ka baara ye koori do go labenni yesannifeere kama. A ka kan ka sanni feere nebila baaraw ke koordogo dilanta fanfe, i n'a fo koorisoo labenni, sannikelaw sigi ga labenni, koorisoda la banbali dilanni, ani sanni keyoro b'e saniyali.

Sanni tuma na

A be senekela ka koori bonyoro jira i la, janko temecogo ka nogoya koori tonw ni nogon ce, ani koori kana nagami nogon na.

A be baara ke ni mana borenin fila ye, n'o ye koori jeman ni wolomabali sangalan ye. Koori be u b'e kono: kelen, koori numan be o kono, filanan, koori wolomabali be o kono. O kooriw n'o manaw be bo koorisene baarada la.

A be baara ke ni seben kunkurunin saba ye : seben jeman, o ye koori numan seben ye seben; neremuguma, o ye koori wolomabali seben ye; seben bilenman, o ye koori juguman seben ye.

Koori filela b'a jiracogo di ko koori ka ni wali koori man ni ?

A b'a bolo fa koori ton na sije 6 wali sije 10, ka olu nagami nogon na, koori sribore do kan, ka soro ka o ni a ka borenin fila taw da nogon koro o waati, a n'a ka koori file jamakulu be soro ka udantige koortigije. Okelen ko, a ni seben min ka kan a togo be seben o la, ka tige, k'a di a ma.

Warisebendilanna

(wecelikela)

Ale ka baara ke minenw file nin ye :


- peseliké kaye ani weceli kaye ;
- koori filela be seben min di senekela ma, o seben ko ye a ka baara keyoro do ye ;
- koori songo seben (baremu), anijatekemansin.

A ka baara file nin ye :

- A be peseliké kaye lafa : ka senekela togo n'a jamu seben, ani koori siri bore hake, ani u kilo hake minnu fora peselikelaw fe.

- a be kilo hake peselenw kafo nogon kan peseli tuma na, hake min be soro a la, k'o ni sebennikelaw ta da nogon koro.

- a be koori warihake jate ni koori songo seben (baremu) ye, wali jatekemasi.



- a be kilo hake ni wari hake seben koori filela ka seben dilen kōkan, ka o kilo hake n'o wari hake sebennensēnēkela ye, ka soro ka seben di a ma

- kakilo hake ni wari hake seben weceli kaye kōno sēnēkela tōgo n'e fe. O yoro bēe, a be o wari weccēcogo seben weceli kaye kōno.

Koori taali izini na Koori taali

Ni mobili be yen, koori peselen be don a kōno a yorōnin bēe. Ni mobili te sanni kene kan, koori be mara silo kōno fo mobili do ka na.

Ni koori senenaba be dugu min na, n'a ka koori be seka mobilifa, walika mobili wotoronin fa, o tigi ka koori te pese dugu basikili la, o be ta ka taa pese izini pōnbasikili la. Kilo hake min mana soro o koori la, o be jate ka fara dugu ka kilo hake kan.

Mogo min ka koori mana ta o cogo la, o tigi be bolomafara don tōn ka kesu la.

Mobili si man kan ka taa nikōriye, ka soro dugu mogo ma da a kan; mobili te pese pōnbasikili la o tigi kō, ponbasikili seben be di a ma

Kunnafoniwponbasikilini dugu ce

dugu be kunnafoni di pōnbasikili ma a ka cidew fe :

- koori hake sannen,
- k'a jira n'u mako be mobili la o dugu je;
- k'a jira ko koori to be silo kōno, wali k'a jira ko koori banna

Ponbasikili fana be

kunnafoni di dugu ma a ka cidew fe, wali mobili bolibaga ka seben fe :

- mobili fa n'a fabaliya,
- mobili soro n'a soro baliya

- ani kunnafoni fen o fen ka kan ka lase dugu ma

6. Koori wari sarali Wecceli kēcogo

Fen min ye wecceli baara ye, a be ke sēnēkela bēe kelen kelen de tōgo la. Wecceliklaw ke sebenniklaw fana b'o baara kelen ke uka jsēbenw kōno.

O baara kēcogo file nin ye: sēnēkela kelen kelen ka kan ka wari min soro, o be wecc :

- dōrōme 2000 biye hake min be di a ma,
- dōrōme 1000 biye hake min be di a ma,
- dōrōme 200 biye hake min be di a ma,
- dōrōme 100 biye hake min be di a ma,
- dōrōme 20 ganan hake min be di a ma ,
- dōrōme 10 ganan hake min be di a ma,
- dōrōme 5 ganan hake min be di a ma,
- dōrōme 2 ganan hake min be di a ma,
- dōrōme 1 ganan hake min be di a ma .

Wecceli kaye kōno, sēnēkela bēe tōgo n'e fe, i be koori girinya, a wari hake n'a wecc kēcogo sebennensēnēkela ye.

N'o baara banna wecceli kaye kōno, weccelikela be soro k'a kōrcē, ka soro ka wari suguya kelen kelen hake jate, k'u da nōgōn kōro, a b'a to, a k'a don, a mako be wari suguya kelen o kelen hake min na ka dugu mume ka

koori wari sara.

O bēe lajelen be ben wari hake min ma, ofana be jate. Min mana soro a la, o ka kan ka ben ni dugu mume ka kooritaalen sōngōye. n'ofila ma ke kelen ye, o kōro ye ko fili kera, weccelikela ka kan ka o fili yoro nini. Sanni wari ka ta, a ka ni weccelikela ka weccelikayejira lakoliden na, wali balikukalankuntig i la, olu k'a sementiya ko fili t'a la.

Koori wari dili dugu ma koorisēben baarada fe

Tōnduguw ka wari sarali be ke koorisēben baarada ka koori san jamakulu fe wali cike kuntig i fe.

wari suguya saba de be di dugu ma :

1. wari min be tila

sēnēkela law ni nōgōn ce, n'o be ben u ka koori feerelen wari ma. O wari ka kan ka ben weccelikela ka wari weccelen ma a ka kaye kōno.

minnu ta pesera dugu kōno wo, minnu ta pesera pōnbasikili la wo, o bēe ta b'a la.

2. min yēlenna koori kan, o wari fana be sara. O ye wari ye min be soro pōnbasikili peseli ni dugu peseli ni nōgōn ce.

3. Dōgo-la-baara sara : wari min be soro-dōgo-la-baara sara ye, o wari jate be minne dugu ka koori feerelen na : o tōni kelen da jateminenen don san o san koorisēben baarada fe.

O wari suguya saba jatelen don koorisēben baarada warisarala fe, ka di

Ka Jekabaara kalan,

o ka ni.

**Ka Jekabaara san
k'a kalan, o ka fisa.**

**Nka ka Jekabaara
bakurubasan k'a
kalan, o de nōgōn te!**

An ka kalan ke barisa kalan ka di; an ka
kalan ke barisa kalan nōgōn te; an ka
kalan ke barisa kalanbalī bōnēna!

tōn dugu ka wari talaw ma. Sēben fana bē di u ma, kunnafoni bēs bē sōrō min na, ka kē seereya ye.

**Sēbennikēla fila
sēbennikēlaw ka baara
kēminenw file nin ye**
- peselike kaye: u ka peselike kaye ni wēcelikēla ta bēs ye kelen ye
- sēnskelaw ka jurusebēn.
- kōorisōngō sēben, wali jatekēmasin
- pōnbasikili sēbenw.

U ka baara file nin ye :
- u bē kilo hake peselenw kafo nōgōn kan peseli tuma na, i'nā fō, wēcelikēla b'a kē cogo min.

- u bē kōri wari hake jate ni kōri sōngō sēben ye, wali jatekēmasin, wēcelikēla b'a kē cogo min.

- u bē kōri kilo hake n'a wari hake sēben sēnekēla ka juru sēben kōnō.

- ni mobili dō nana kōri tali kama, u bē sōrō ka pōnbasikili sēbenw lafali damine :

1. kōri tali kaye
u bē don sēben, ka mobili bolibaga tōgō n'a jamu sēben, ka mobili n'a wotoro nimōrōw bēs sēben, ani pōnbasikili sēben nimōrō, ani kōri talen kilo hake.

2. pōnbasikili sēben
O sēbenw bēdipōnbasikili tigi de fē. O sēben kelen

kan, i bē sēnekēla tōgō sēbenneñ ye (n'o tigi kelen yemobili fa), wali dugu tōgō, ani kōri talen kunnafoniw bēs.

Sēnekēlaw ka kōri wari sarali.

O baara bē kē wēcelikēlaw ni sēbennikēlaw fē. Sēnekēlaw tōgō bē wele kelen kelen, i n'a fō, a bē wēceli kaye kōnō cogo min na. Bēs k'i ka kōri wari sēben jira, ka sōrō k'i ka wari mine. Temen te kē mōgo si kan, a bē ta da fē, fo k'a foori.

Ni min ka wari dira a ma, o tigi b'a tilen juru kanilaw ma, k'a ka juru bēs sara

yanni a ka taa so.

A' y'a to a' hakili la Kōri kōlōsili

Kōri kōlōsili yesannifeere baara dō de ye. O la, kōri kōlōsili wajibiyalen don duguyiri-watōn bēs ma, k'a d'a kan kōri b'u ka yamaruya kōnō, f'a tatuma kōri sēne baarada fē.

Mobili lafacogo

Ni mobilitaara awka kōri ta, a' y'a jija k'a dōn kōsēbe, k'a fa teliya la, ani k'a siri ka ne.

**Mamadu Jalo
Buguni CMDT
kalanbolofara
kuntigi.**

Jamana ka arajow lamēnbaaw

Jamana baarada ye arajow sigi, fōkō bē Segu, Kucakan bē kucala, Arajo Jamana bē nōrō. Arajo ninnusigikun'ukalikan ye ka fasokanw sankorōta, ka seko ni dōnko tōw bēs yankan, ka kalan kē sinsinbere ye, ka dōnni forobaya, ka faamuya jiidi walasa yiriwali ni lafiya kabasigi an ka maraw kōnō.

Nin kuntileñna ninnu te se ka ne sōrō abada ni lamēnbaaw m'u joyōrō fa.

N'i y'a men ko nci bē doniba ta, nunbaa numan de b'a la.

Ni lamēnbaaw ye arajo k'u ta ye, ka hakilina numan di arajo ma, k'u ka kunnafoniw ani ganseliw jēsen arajo la, k'u ka duguw n'u ka dōnniye lase arajo fē, fosi t'a to ni sigida ma yiriwa. O tuma arajow ye baarake minen numan ye walasa yiriwali ka ne sōrō an ka sigida la joona Jamana kōni kera sabajuman ye ka Arajow sigi. U nafa bē sigida de kan. Arajow tōnō sōrōli to bē lamēnbaaw de bolo.

So file, kēne file, bolibaa e bē mun kōnō ?

**Tonton Dani
Kucala**

U ko...

Adamaden de ye dijē binju barikantanba ye. Nka binju miiribaga don. O de kanma a bē dijē n'a kōnōfēn bēs don a sagonada fē.

Pasikali : "Adamadenya taasira kōnejinibaga"
(1706 - 1767)

- Adamaden bēs wolocogo ye kelen ye, sigida de b'u bila nōgōn ne ani k'u bila nōgōn ko.

Zan Zaki Uruso

Ni adamadenw tun b'a dōn ko, waati o waati, n'u y'a kanu ka k'u mōgōjōgōn kan nanbara taasira fē, k'u bē k'u yēre de kan, jugumankē tun bē duga dijē kōnō.

Mariten Luter Keng

Jōyōrō te fen wēre bolo dijē sosigi la sodansow ko. I bē kē nana ye, walima i bē laban nanaw ka tōn kōnō !

Bilisi Sidibe

Segu sogosaara tabaga.

Bilisi ye cē ye. Cē dafalen. Nka min y'a ka cēya je, o de y'a dōnbaliya y'a fē ko cē bē, cē wēre bē.

**Bakarijan Kone
Bilisi Sidibe minēbaga**

Balikukalan sanyelema jenaje kunnafoniw Kaaba (Manden)

Dantigeli

Bee lajelen b'a don ko setanburukalo tile 8 ye don ye min kerenkerennen don dije kono balikukalan togolaseli kama.

Seli don, balikukalanden bee ka seli don, sabu balikukalan ye kibaru dafalan ye. A be san damado bo sisan, Kaaba mara (Manden) balikukalan karamogow n'a kalandenw y'u bolo di noggon ma ben ani kelenya kono ka balikukalan gintan in laben Kaaba otiwale "depariteman" Zafuw kono. Seli in be dakunbo

Zafuduguwni noggone. N'u jera k'a ke dugu do la ninan, san nata a be ke dugu were la. Balikukalangintan in nafa ka bon kosebe. A ye ben ni kelenya sinsin Kaaba otiwale zafuduguw balikukalan karamogow ni kalandenw ce kosebe, ka donniya caman forobaya. Balikukalanden, karamogow ceman n'a musoman bee dama ka kan seli in na. Donniyaw falenfalennen don anihakilijagabodon y'a ye. Kaaba kafo nemaa, "Seyase" nemaa, bagandogotorow nemaa,

konyakonemaa, jinkungo nemaa, ani jamana lakanajekulu min be Kaaba (Zandaramu) nemaa Kaaba kono, minnu bee ye balikukalan kanubagaw ye, u bee cesirilen don su ani tile walasa kibarukalannaw jigi be fa cogo min, kalan be se ka sabati Manden cogo min, u bee ka lajini ye o de ye.

Balikukalan karamogow ka nemaa n'a noggone bee ko: k'unice. Ninan, Manden (Kaaba) balikukalan karamogow n'a kalandenw bee be yafajini ke nemaa

fe, k'a d'a kan u ma se ka seli in ke ka ben a don yere ma. Osababu te dowerye, a waati y'a soro Manden Kaaba mara dugu ce taama ka gelon kosebe, jitun kelen don ka yorobee lafa. Okoson anye balikukalangintan bila fo ji ka jigin mogow ka se ka taama dugu ni dugu ce n'a ma ke geleya ye. Seli kera fo setanburukalo tile 18 san 1996 Degela dugu kono, Degela min ni Kaaba ce ye kilometere wooro ye. O ma ke baasi ye nemaa ma, sabu ji fen don a ma ni; n'a y'i dun fu y'i dun.

Bamananw ko: jidon o, sodono, koyeredon nogonte. Araba, san 1996 kalo 9nan tile 18 don, sogoma nege ne 9 dafalen tewu, an ka kafo mogoba minnu welelen jenaje inkama olusera kene kan Degela dugu kono. Santiridugu 46 tun be kene kan. Geleya yera dugu caman ka nali la. Nemaa bisimilalen balikukalan karamogow fe Degela denmisew ka jenajeso kono jenaje bolodacogo file nin ye Degela:

1°) Degela dugutigi ye jama bisimila ni foli ani nisondiya ye, k'u bolen u ka so, ka na u ka so. Mogoo mogo be kene in kan; a ka foli b'u bee ye.

2°) Balikukalan nemaa Abudulayi Keyita ye jama bee fo k'u walenumandon.

3°) Degela dugu balikukalan karamogow: Umaru Tarawele ye kunnafoni kerenkerennenw di. Degela kalanko, baaracogonia yiriwacogow kan.

4°) Karamogo Mamadi keyita n°2 ye yeredon poyi kalan jama ye.

5°) Kaaba kafo nemaa

ye a n'a noggone bee dantigeli kelen ye.

6°) Degela musow ye noggone laben u ka noggonsin jatebocogo kan kalo salen; o noggone ye hakili caman di dugu were musow ma jenaje in kene kan. O bee temenen operasiyon otiwale mogow ye ladiyalifen di dugu saba ma.

Ladiyalifen dilenw kunnafoniw file nin ye

Dugu saba minnu ye ladiyalifen soro olu ye nin ye:

Folo : Karan

Filan : Selafugu

Saban : Degela dugu musow (a ye katimu laje)

Karan ladiyalifen dira kaaba kafo nemaa fe karan ciden ma. Selafugu ladiyalifen dira Degela dugutigi fe Selafugu ciden ma.

Degela musow ka ladiyalifen dira Abudulayi Keyita fe, Degela musow ka ciden ma. Nin baara ninnu bee lajelen kolosili tun don Kaaba "depariteman" Zafukuntigi dankan fila fe minnu togo file nin ye:

1°) Fatumata Jakite, Zafukuntigi dankan Kaaba otiwale la.

2°) Mariyamu Sise, Zafukuntigi dankan Figira tomo otiwale la Kaaba.

Ninjemukan kunbabaw lasera aw ma karamogo Mamadi Keyita n°2 fe.

Dugu sugar-dilenw togo	kuru folo : karan	kuru filan : Selafugu	kuru sabanan : Degela musow
karan dugu	toliden 20	dorum : 4 000	dorum 2 000 taji litiri 30 tubabu lanpan 1 farasu pake 1 tiircilan kunba 1 gafenin 5
Selafugu dugu	taji litiri 10	taji litiri 20	
Degela dugu musow	gafenin 5	farasu pake 1 tubabu lanpan 1	

Politikiton ye mun ye ?

Kabini 1991 San Marisikalo tile 28 jekawuli, politikitonko hakilinan donna Sanga la k'a ke sigi taabolo kura do ye an ka Jamana kono. O wale in faamuyali ka nogo, bawo an ka polikiko fololama tun banbannen be politikiton kelenko de kan. O waati la, politikiton kelen de tun be Mali kono min togo tun ye UDPM ye. Ale tun kelen be ka jamana politikiko bee ben a kelen ma.

Mali jamana fanga bolo filanan tile la, politikiton ni fanga tun dorogolen be nogoona. O cogo la, faso taabolow na politikiko kuntilenna bee tun bee ton kelensago la kafarajamana kan, pariti politiki-kelen-fanga ye lahalaya ye min tun daga be Afrika jamana caman werew kunna.

Jemufanga walima bee yafanga, kera sababuye ka politikiton camanko don Mali kono. O siratige la, politikiton caman sigira sen kanminnu dowy "USRDA", CNID, ADEMA, UDD, RDP, MIRIA, ni PARENA



Politikiton nenama bee ka fanga be a nofe jamakulu de la politikiton ye.

An be don min na i ko bi, politikiton 60 nogoona be Mali kono. Politikiton ye jerekulu ye min dagalen be Jamana dugukolo mume walima sigida kerene rennen kan. Politikiton tondenw ye mogow minnu jelen be hakilinan kelenw na. Osiratigela, ton be jama were jini ka fara tondenw kan ka fanga jini ton kuntilennaw lawaleyali kanma. Sariyaw sigira politikitonw togo la Mali fangalatemen jekulu CTSP fe 1991 san okutoburukalo

tile 10 min dakun ye nimoro 91-075/Pye. Osariya sigilen in be politikitonw baara kecogo n'u taabolow dantige.

Politikitonw sigikun ye fasojama Iadamuni na dusulaminniye walasa a k'a joyoro fa fasoden numanya kene kan, minye nemogosigi wotew ye. O baaraw be ke politikitonw togo sariyaw kuntilenna kono.

Politikiton camankotile in na, a dagalen don jamanaden kelen-kelen bee k'a sagonna ton sugandi ka don o la, walasa k'a joyoro fa

faso joli la k'a soro ma keno ni mankan ye. Mogoo si wajibiyalente ka don tonna, min t'a sogonna ta ye. Mogoo be se ka bo ton do la, ka yelema do were la, min kono sariya na benkan be ben i ma. Politikiton kelen tondenw be je u ferema k'u hakilinanw lawaleyali baaraw laben nogo fe. Bi, Politikiton ka mogoo yamarayalnw de be fanga nofegenni ke wotew sen fe. (jamana sariya blonba lasigidenw sugandi wote, kinkuntigi sugandi wote, ani jamana kuntigi sugandi wote) Walasa ka fanga soro u ka ferew lawaleyali kanma, politikitonw b'u sinsin u ka baara bolodalenw kan k'o ke jama nininkan ye wotew sen fe.

Politikiton sigicogo.

Politikiton ni jekuluton gansanw te kelen ye. Politikitonw sigicogo na baara taabolow dantigelen don sariya fe k'a jeya

Boko nata kono, an be kuma Politikiton sigicogon'a baaraw taabolo kan Mali sariyaw kadara kono aw ye.

**Idirisa SENU
Bayelemabaga Bakari
SANGARE**

Maakoroba kurna

Kuma ma ni, kumabaliya ma ni

Dine jamanaw bee keno, joyoro min be kuma kora ma la, o ka bon kosebe. O joyoro yemogow hakili dayelenniye walasa k'u dege kuma la, gasi te kuma min na. O sababu bora fen min na, o ye bee

sirancogo ye kuma ne, kuma ma ni, kumabaliya fana ma ni. A be se ka fo kokuma kora ma be mogow kalan, k'u bilansira u ka dinenatige kow nefoli la. Ni kuma for'a ne numan kan, hakili jakabo min be

nini, o te sira soro bawo bee b'a don ko mogow be segen kuma kora ma kora ninini na. O hakililabaara yere y'a danma kalansen ye, min nafa ka bon denmisennamogow kan cogo bee la. O de be na ni

kuma foli ye a nejugu kan k'a kodon ka sor'a bee ma fo ka ban. O siratige la, a be fo ko kuma te nigin k'a ji caya, a te ja k'a ji dese.

Mogo te se ka to kumabanbalifo la tuma bee. O ma ni. Mogo te se

ka to kuma-kuntige ni makun na tuma bëe. O fana ma ni. O b'a jira ko kuma ye hakelako de ye. Kuma te fo ka danmatemén. Kuma te fo ka dan sira la. Ni kuma kuntaala janyara ka sor'a fokun ma faranfasiya, a be ke kuma kalantan negebolen ye. Ni kuma surunyara ka sor'a fokun ma faranfasiya, a be ke kunnasiri kuma ye. Ni kuma fokun faranfasiyara, ka nogo b'a la, k'a jeya ka sor'a ma janya kojugu, a ma surunya kojugu, o de ye daamu kumà ye, negebóni kunnasirte min na.

A be fo kumalaba bëe ma k'u dalakan ka ca, k'u nén kadi ka sor'a kise te jaba la. N'a dönnna ko mögo min ye kumalaba ye, bëe be siran o tigi ne fo k'a fekuma negebó mögów la. Olu da te temen ko la. U te mögo lamaloya kuma dön; u te mögo bilançonna kuma dön; u te mögo coron kuma dön; u te negenni kuma wali dusufaga kuma ni gundo borotokuma n'u nogoñna dön. Olu ta ye "bëefo" ye, a diya n'a goya la.

A be fo kumabali bëe ma k'u da ka girin, k'u nén man di, ko kuma ka gelén u ma. Daamu te kumabali fe kuma la. A te dimin bo a yere la, kuma te mögówere ma. N'a dönnna ko mögo min nén man di, mögo t'i kunsin a la tugun. Hali n'a joli ka di mögów ye,

kumabaliya b'a negebo bëe la. Kumabali te mögo jenogón ye, bawo a makuncogo wali a ka kumma kuntigecogo bëe ye lamaloyako ye. O temennen ko, kumabali fe kuma yemunundanbëe ye. A be mögo son ja k'i töoro cogo min na, kumalaba fana fe kuma b'o cogo la. A fila si te kuma joyoro dön mögów cekow nödönniko numana.

O siratige la, kuma joyoro be tali ke a fokun, a foyoro, a fotuma, a focogo n'a hake bëe kan. N'a y'o joyorow döro kelen je, nafa t'a la tugun. A b'i n'a fo mögo min bora dununfoyoro la, ka t'i konobaragosi. Odeko son a be fo ko kuma be tige mögo la n'i m'a fo a foyoro jenjonna, walin'iy'a kokari, k'a lanogo fo k'a tije bögöbögo. Kuma ye siranyafen de ye. Mögo te farati kuma la. A be tila mögo la, a be tunun mögo la. Mögo minnu be kuma kalama, olu b'a jira ko kuma ye todan de ye, n'i ye do ta, do be bo, wali ko fen bëe b'a den' wolo, kuma b'a bolo. Obë kuma bonya n'a jirinya jira.

Ni kuma ji cayara, k'a donyoro n'a boyorocaya, a be wolo fen do wali fen caman na, sigi kelen te ni minnuye. Nikumabali döw ye kuma kunkurunni suguya döfö, o fana be se ka wolo fen do wali fe caman na, sigi kelen te ni

minnu ye. O siratige la, sigi kelen te ni fen minnu ye, tije ni nkalon b'olu la, ani ben ni bënbalaya, je ni farali, diya ni goya, danaya ni tigensonya ani here ni balawu. O fen minnu be bë kuma la numansira ani jugumansira kan, olu de be mögów taabolo dantige. Olu de be mögów nösin nögon ma. Olu de be mögów kësin nögon ma. Olu de be mögów nödon, k'u nöebö, k'ulasiranya, k'u lafarinya nögon ne. N'o kera sa, bëe b'a dön min ye min ye. O de bëna ni mögo mineli y'a kumakan ma, bawo kumakan ka gelén. A be mögo ke danamögö ye. A be mögo ke tigenamögö ye. Kuma de be mögów tila k'u ke kulu ni kulu ye.

O siratige la, nin kera Masake dö ye, min y'a ka jamanana marabolow bëe nömögów fanali naniya siri. O kanma, a y'olu tila kulu fila ye. Kulu folo mögów ye kumadumanfölawye. Kulu filanan mögów ye kumagoman folaw ye. N'a bora kuma focogola, ubëebe Masake fe, u bëe be baara ke. O n'a taa o taa, Masake dalentegomanfölawla. O koson, a ye jatemine döke fanalikola, ka gomanfölaw nidumanfölawfanalidonw bo nögon körö. A tun t'a fe k'olu bëe lajelen wele, k'u fara nögon kan, këne kelen ani don kelen na walasa a kana körösi k'a

be döw fe ni döw ye.

Fanali daminéra gomanfölaw la. Odon na, Masake y'a f'a ka kojenabola ye ko dumunifén min ka go ni dije dumunifénw bëe ye, a k'o de tobi. O la, nén tobira. Bëe y'o dun k'i fa. Masake ma fen fo.

Fanali selen dumafölaw ma, Masake y'a jira ko dumunifén min kadi ni dije dumunifénw bëe ye, o de ka tobi. O la, kojenabola ma fen fo, nka a ye nén de fana tobi tugun. Masake ma fosi faamuya.

Fanalijama jensennen ko, Masake konorofililen y'a ka kojenabola ma nininka, cogo dinen be se ka ke dije dumunifénw bëe la duman n'a goman ye. Kojenabola yelela fo Masake tun bëna dimi. A sorola k'a nöfö Masake ye konenkoka gelén kosebë, ko nén kadi, nén ka go, nén ka fegen, nén ka girin, nén be tije fo, nén be nkalon fo, nén be kuma dumanfo, nén be kumagoman fo, wa ko nén min be mögów fara, o nén kelen de be mögów kala. A y'a jira Masake la, ko nin bëe de kera nén tobikun ye, walasa jugumanfölaw ni gomanfölaw si kana jigin u ka Masake la. Masake ma kuma sor'a k'ofotugun. Nin be kuma joyoro jira mögów cekow la.

Amadu Gani KANTE

Kunnawolojala do yangara Mali kunna


CISAC, n'o ye dijé mögo faamuyalenwka tónba sigilen ye, ka nesin nininisiraw ma seko ni döñko siratége la, o y'a ka sanumedayi di Solomani Sise ma, a ka baaraw koson sinimanko ta fan fe. Sanumedayi in de bë wele ko : "letalón de yénega" (Yénega ka dafeje). An bës b'a dòn ko Solomani Sise ye Maliden de ye. A bangera Bamako. A y'a ka kalan bës ke Bamako; Dakaro ani Mösuku. An bë don min na i ko bi, sinimanko siratége la, a ka jadilannenw tógo ye ko:

- "Tile 5 si kuntaala kono", o dilanna 1972 san



Solomani Sise

camantunténa u ka kokorow, n'u danbew, u sekow n'u dònkok lahalaya dòn bele. Fen minnu de b'u ka



Kunnawolojala diyoro Solomani Sise ma

- "Denmuso" (1974 san)
- "Baara" (1978 san)
- "Finé" (1982 san)
- "Yeelen" (1987 san)
- "Waati" (1995 san).

Nin ja dilannenw bës ye jalaw soro ka temen. U jirala dijé fantanninaani bës kono, awa u kéra kunnawoloko ye, o yoro bës la. O de koson CISAC némogo y'a jira ko ni Solomani Sise n'a nögónna dönnikelaba dòw tun te farafinna yérewoloden

yérewoloya sementiya ka t'a fe.

Medayidira Pari, san 1996 setanburukalo tile 16. Okéne kan, Solomani Sise y'a jira ko nin bonye min dara ale kan, k'o bë Mali de yanga haali. Medayi in ye Maliden bës de ta ye. Halibian bës ka je ka dugawu ke Ala ka Mali sinimanko taa ne.

Tumani Yalam Sidibe ni Mamadu Yusuf Sise

Musow ka ntolatanko lahalaya

Farikolonénaje kadara kono, Mali jamana lakodönnen don kosebe ni ntolatanko de ye. Ntolatan këbaga n'a kanubagaw ka ca kosebe an fe yan; denmisén kunda ani maaköroba kunda.

Waatitémennew kono, ntolatan tun jatera "cebaaraw" fe, k'a ke cew danma ka koye. Nka o bës n'ata, anbalimamusow ma to ko. U kelen-kelenw tun bë ye cemisénw céro bolonw fe ntolatan fere denninwkan, k'upasawbø nögón na. Bi, musow ka sennantolatanko témenna olahalaya kan. Musolakaw ye ntolatantonw sigi sen kan ka ntolatanferew ke u taayorow ye. Musow ka sennantolatanko jarabi bonya koson, Jekabaara ka ciden sera a kolew labenjekulu nëmaa Amadu Alfuseni Ture ma, k'a ko nëjini. Mëen tigila ye mëenni dan ye.

Amadu Alfuseni Ture ka fo la, a bë san tan ni k'o bë

bi, musow bë ntolatan u yérew ka kulu kono. "Awa Pekos" n'a nögónw kofoli b'owalesemenciya. Bawo, olu ka ntolatan waati te bilakoye. Musow k'ulaben ka ke ntolatanton ye, ka yamaruyasében soro o tón togola, o fölo kera 1991 san kono. O waati bë se ka jate k'a ke musow ka sennantolatan ka sannayelen damine ye. An bë don min na i ko bi, muso sennatolatanjekulu 12 bë Bamako, minnu ka yamaruyasében b'u bolo. Musontolatan tón fila bë Kayi mara kono, fila bë Segu, kelen bë Kucala mara kono. Olu tónw fana lakodönnen don sariya fe. Min ye Kucala mara ta ye, o tón yoboyabalen don nin waati la. Nin tón ninnu bës bë bë Mali farikolonénaje. Ko minisiriso ni Mali ntolatanko cadaw númma bawo, nin cakeda fila bës b'u jeninyoró fin muso ntolatan nénajew kadara kono. An bë don min na i ko



1996 san - Ókutoburukalo

bi, nənajesiraw bolodalen te an ni an dafé jamanaw ce, nka 1994 san kono, muso ntolatanton "siper Liyoni" (Warabamusoman dankelen) npogotigiwtaara nəgənkunbenntolantan ke Senegali jamana faaba kono, min kera kunnawolo ba ye. Muso ntolatanton "As Mande" fana ye nəgənkunben nənaje ke Gana jamana musow fe, min komasegin nənajes kera an yew fe yan. Nka o ni sababa ma ben. Nin kɔkantaa filaw ni nəgən ce, Burukina Faso muso ton kelen nana teriya nəgənkunben ntolatan ke an fe yan. Min ye ladala nənaje ta fan ye, Mali kono, muso ntolatantonw be tənnjana-nini-ntolatanw ke ka fara kupumankanwkan.

Musow ka ntolatansan 1994-1995 tənnjana-nini-ntolatanw nana kera Siper Liyoni (warabamusoman dankelen) ntolatanton ye, ka As Mande d'ale kan. Bibi in na, Siper Liyoni santoro, As Mande ni tigeresi (jaraminejara musoman) ye muso ntolatanton waanew ye Bamako kono minnu be mögo ninsöndiya ntolatanko kadara kono, k'a da tənw labenko ni a musow ka ntolatan kecogo kan.

Musofililajla fila bekené kan bi. Awa "Pekos" ni Kanku. O b'a jira ko muso ntolatan. Iahalaya la, danfara te musolakaw ka ntolatan ni cew ta ce.

Bi, musowka ntolatanko te ko basigilen ye. A be

dilannisenfe halibi, yalidon nataw la, lajininw ye jumew ye?

Nin nininkali kera Amadu Alfuseni Ture la. A ka jaabi file.

- Anw b'a fe muso ntolatan ka ke musow ka bənəgəla sababu ye an ka jamana kono. Musomaninw be yan bi, minnu tun ka kalanko banna pewu. Utun te forobakalansow la, kenyereye kalansowlataali fana setunt'u ye. Ntolatan kera sababu ye k'olu ka kalanko nənabo. Musomannin dow fana be yan bi, ntolatan kera sababu ye k'olu bangebagaw ke bolifentigw ye. Bawo bolifen minnu dira olu ma, u ye o lateñen u bangebagaw ma. Musow ka ntolatan ka ta ba la, o ye anw sago ye. Hali n'a mata i ko cew ta. Yanni musontolatan ka san tan soro, anw b'a fe a ka Afriki kupuba ta; yanni an ka san 36 soro a la, an b'a fe diñe seleke 4 be se k'an lakodon. Ce ntolatannaw ye san 36 ke ntolatankenebaw kan, olu ma doweré soro kupu fila ko; minnu tara an ka jamana kerefe nənajew kene kan. Anw b'a fe ka temen o kan.

Nin naniya numanw kofe, Amadu Alfuseni Ture ye kunnafoni nafamaw di minnu b'a jira ko musontolatan talen be ba la Afriki ntolatanko baara da fe. 1999 san nata kono, kupuba bolodalen be diñe seleke 4 musontolatannaw təgo la min nənajew be ke

Lameriken jamana kono.

Soroko ni darajako temennenkofarikolonenaje ye ladamuni feere sabatilenba deye. Hakilini farikolo layiriwali k'o fe, farikolonenaje be ben ni kelenya sabati a kebagaw ni nəgən ce. Nin nafabaw koson, musolakaw ka kan ni demen ye walasa u fana ka bo a nun ma.

Jekabaara təgo la, an be Amadu Alfuseni Ture n'a ka jekulu be se fo u ka faamuyako numan na.

Farikolonenaje welewele

1998 san Afriki kupuba nəbila nənajew kadara kono, Mali bənkamalenw cedenw taara nəgən kunben ntolatan ke Benen jamana ntolatanton cedenw fe karidon, 1996 san setanburukalo tile 6. Nəgənkunben ntolatan in kera kunnawolo ye bawo bənkamalenw ye Benenkaw dan kuru 2 ni kelen. Don nataw kono, bənkamalenw ni Alizeri jamana cedenw ani Kodiwari jamana cedenw bəna nəgən derew ke. Yanni o waati ce, a be se

CMDT mögo minnu ye sebenni ke boko in kono

Madu Yusuf Sise
Dawuda N. Dawa
Adama Tarawele
Mamadu Jalo
Yusuf Jime Sidibe
Siyaka Jara
Nanpi Sanogo
Drissa Jalo

k'a fo ko an ka cedenw doncogo nəna. Alizeri jamana ye Kodiwari cedenw dere kuru 4 ni kelen.

Afriki ntolatanton mankanninw ka kupuba nəbila ntolatanw kadara kono, an ka bənkamalenw mankanninw ye Moritani jamana denmisew dere an yere fe yan kuru 3 ni 0.

Dəgəkuntəmənnen, Mali bololantolatanton mankan, npogotigiw ye Afriki bololantolatanton kupuba yalon. 1998 san kono, u be taa faso jəyərə fa diñe seleke 4 bololantolatan kupuba kene kan.

Ko su diya be dən a fitiri la. Ntolatansan damine be cogo min na nin ye, mögo be se ka jigiya bisigi. Farikolonenaje ye jamako de ye, an ka fara farikolonenajelaw kan ka kunnawolo nini faden kene kan.

Bakari Sangare

Jekabaara

Labolikuntigi
Tumani Yalam Sidibe
Sebenjekulukuntigi
Tumani Yalam Sidibe

Sebenjekulu
Bakari Sangare
Amadu Gani Kante
Bakari Kulubali

Nəgenw kebaga
Nuhun Madani Tarawele
ko Banun

Baarakenogonw
MAKOCI, SNV, OCED
Hakəbəta:
11 000